



REPUBLIKA E SHQIPËRISË
KËSHILLI I MINISTRAVE

PROJEKTVENDIM

Nr. _____, Datë _____._____.2018

“PËR

**PROPOZIMIN E PROJEKTLIGJIT “PËR DISA NDRYSHIME DHE SHTESA NË
LIGJIN NR. 8438, DATË 28.12.1998, “PËR TATIMIN MBI TË ARDHURAT”, TË
NDRYSHUAR”**

Në mbështetje të neneve: 81, pika 1, dhe 100, të Kushtetutës, me propozimin e ministrit të
Financave dhe Ekonomisë, Këshilli i Ministrave;

V E N D O S I:

Propozimin e projektligjit “Për disa ndryshime dhe shtesa në ligjin nr. 8438, datë 28.12.1998,
“Për tatimin mbi të ardhurat”, të ndryshuar”, për shqyrtim e miratim në Kuvendin e Republikës
së Shqipërisë, sipas tekstit dhe relacionit që i bashkëlidhen këtij vendimi.

Ky vendim hyn në fuqi menjëherë.

K R Y E M I N I S T R I

EDI RAMA

MINISTRI I FINANCAVE DHE EKONOMISË

ARBEN AHMETAJ



REPUBLIKA E SHQIPËRISË

KUVENDI

PROJEKTLIGJ

Nr. _____, datë _____ 2018

“PËR DISA NDRYSHIME DHE SHTESA NË LIGJIN NR. 8438, datë 28.12.1998 “PËR TATIMIN MBI TË ARDHURAT”, TË NDRYSHUAR”

Në mbështetje të neneve: 78, 83 pika 1 dhe 155 të Kushtetutës, me propozimin e Këshillit të Ministrave, Kuvendi i Republikës së Shqipërisë:

V E N D O S I:

Në ligjin nr. 8438, datë 28.12.1998, “Për tatimin mbi të ardhurat”, të ndryshuar”, bëhen këto ndryshime dhe shtesa:

Neni 1

Në nenin 4 “Burimi i të ardhurave” bëhen ndryshimet si vijon:

1. Shkronja “dh”, ndryshohet me përmbajtjen si vijon:

“dh) të ardhurat nga:

i) pasuria e paluajtshme, aksesoret dhe frytet e tyre, si dhe të ardhurat që rrjedhin nga të drejtat mbi pasurinë e paluajtshme që ndodhet në Republikën e Shqipërisë; dhe

ii) të drejtat për shfrytëzimin e pasurive minerale, të drejtat për shfrytëzimin e pasurive hidrokarbure ose të drejta të tjera për shfrytëzimin e burimeve natyrore nga toka ose deti brenda sovranitetit të Republikës së Shqipërisë, si dhe informacionit që u përket këtyre të drejtave;

2. Shkronja “e”, ndryshohet me përmbajtjen si vijon:

“e) të ardhurat nga tjetërsimi i:

i) pasurisë, të drejtave dhe informacionit të përmendura në shkronjën "dh" të këtij neni; dhe
ii) aksioneve ose interesave të ngjashme, siç janë interesat në ortakëri ose truste, kudo që ndodhen, në qoftë se, në çdo kohë gjatë 365 ditëve para tjetërsimit, këtyre aksioneve ose interesave të ngjashme ju rrjedh më shumë se 50 për qind e vlerës direkt ose indirekt nga pasuria e paluajtshme, të drejtat ose informacioni të përmendura në shkronjën "dh" të këtij neni”;

3. Pika “h”, riformulohet si vijon:

“h) të ardhurat e një personi jorezident, të përftuara si rezultat i pagesave të kryera nga një person rezident shqiptar, për shërbimet e kryera nga ky person jorezident”.

Neni 2

Në nenin 9 “Tarifat tatimore”, bëhen ndryshimet si vijon:

1. Në pikën 1, pasqyra nr.1 zëvendësohet me pasqyrën nr.1 që i bashkëlidhet këtij ligji dhe është pjesë përbërëse e tij.

2. Në pikën 2, hiqet togfjalëshi “Dividendët, të ardhurat që rrjedhin si fitim i ortakut, qoftë ky ortak i vetëm”.

3. Pas pikës 2, shtohet pika 3 me këtë përmbajtje:

“3. Dividendët, të ardhurat që rrjedhin si fitim i ortakut, qoftë ky ortak i vetëm, taten me 8 për qind”.

Neni 3

Në nenin 16, në pikën “1”, shtohet shkronja “d” me këtë përmbajtje:

“d) çdo person jorezident që nuk parashikohet nga shkronjat a), b) ose c) më sipër, dhe që nuk i nënshtrohet tatimit mbi të ardhurat”.

Neni 4

Në nenin 21 “Shpenzime të panjohura”, shtohet shkronja “p” me këtë përmbajtje:

“p. shpenzimet për dieta që tejkalojnë 50 për qind të fondit të pagës bruto vjetore.”

Neni 5

Pas nenit 27 shtohet neni 27/1 me këtë përmbajtje:

**“Neni 27/1
Ndryshimi i pronësisë**

1) Nëse gjatë një periudhe tatimore pronësia direkte dhe / ose indirekte e kapitalit aksionar ose e të drejtave të votimit të një personi juridik ndryshon me më shumë se 20% në vlerë ose numër aksionesh, personi juridik trajtohet si të jetë duke shitur një pjesë proporcionale të të gjitha pasurive të tij menjëherë përpara ndryshimit. Personi juridik trajtohet si:

a) përfitues i të ardhurave nga shitja, e barabartë kjo me pjesën proporcionale të vlerës së tregut të aktivitetit në atë kohë; dhe

b) riblerës i aktivitetit për të njëjtën vlerë.

2) Kur një person juridik paguan tatimin mbi fitimin sipas këtij ligji, bazuar në paragrafin 1) më sipër, çdo ndryshim pronësie i aksioneve ose interesave të krahasueshëm që shkaktojnë ndryshimin, është i përjashtuar nga tatimi mbi fitimin.

3) Një person juridik i cili është subjekt i një ndryshimi të përmendur në paragrafin 1) më sipër, duhet të njoftojë autoritetet tatimore me detajet e ndryshimit brenda 45 ditëve nga koha kur ka ndodhur ndryshimi.

4) Personi juridik duhet të njoftojë administratën tatimore për një ndryshim pronësie të drejtpërdrejtë ose të tërthortë prej 10% ose më shumë të kapitalit të saj ose të të drejtave të votës. Ndryshimi i pronësisë duhet të jetë objekt i nenit 4 (e) (ii) të këtij ligji. Njoftimi duhet të kryhet brenda 45 ditëve nga ndryshimi i pronësisë. Kjo dispozitë nuk zbatohet në rastet kur zbatohet paragrafi 3).

5) Në rast të mosnjoftimit të autoriteteve tatimore personi juridik dënohet sipas penaliteteve të përcaktuara në Ligjin “Për procedurat tatimore në Republikën e Shqipërisë”.

Neni 6

Pas nenit 30, shtohet neni 30/1 me këtë përmbajtje:

“Neni 30/1

Deklarimi dhe pagesa nga persona jorezidentë specifike

1) Një personi jorezident të përcaktuar sipas Nenit 16 (1) (d), i kërkohet të përgatisë një deklaratë të të ardhurave të tatueshme sipas Udhëzimit të Ministrit të Financave. Deklarata duhet të dorëzohet sipas afatit të përcaktuar në nenin 29 të ligjit.

2) Në kohën e paraqitjes së deklaratës sipas paragrafit 1), personi jorezident duhet të paguajë shumën e tatimit të deklaruar në llogarinë bankare të administratës tatimore. Nenet 30 dhe 37 nuk zbatohen për këto raste”.

Neni 7

Në nenin 33 “Mbajtja në burim e tatimit mbi të ardhurat”, pika 1 ndryshohet me përmbajtjen si vijon:

“1. Të gjithë personat rezidentë në Republikën e Shqipërisë, organet e qeverisjes qendrore e vendore, organizatat jofitimprurëse dhe çdo subjekt tjetër, i njohur nga legjislacioni në fuqi, janë të detyruar të mbajnë tatimin në burim nga shuma bruto e pagesave të mëposhtme, që lindin nga një burim në Republikën e Shqipërisë sipas shkallëve të mëposhtme:

1.1. 15 përqind për:

a) interesat dhe pagesat e ngjashme me to:

b) pagesat për të drejtat e autorit dhe për pronësinë intelektuale:

c) pagesat për shërbimet teknike, shërbimet e menaxhimit, shërbimet e konsulencës, shërbimet financiare dhe ato të sigurimit:

ç) pagesat për menaxhimin dhe pjesëmarrjen në këshillat drejtues:

d) pagesat për ndërtimin, instalimin, montimin ose për punë mbikqyrëse që lidhen me to:

dh) pagesat për qeratat:

e) pagesat për shfaqjet e aktorëve, të muzikantëve ose sportistëve, përfshirë pagesa të tilla që u bëhen personave, të cilët punësojnë artistë ose sportistë apo ndërmjetësojnë për shfaqjet e tyre:

ë) të ardhurat e individëve nga lojërat e fatit dhe kazinotë:

1.2. 8 përqind për:

a) dividendët:

b) ndarjet e fitimit”.

Neni 8

Në nenin 38 “Dispozita kalimtare”, shtohet pika 9 me përmbajtjen si vijon;

“9. Norma e tatimit mbi dividendin në shkallën 8% do të aplikohet edhe për fitimet e pashpërndara të realizuara në vitet 2017 e më parë, me kusht që këto fitime të mos jenë kapitalizuar”.

Neni 9

Ky ligj botohet në Fletoren Zyrtare dhe hyn në fuqi më 01 Janar 2019.

K R Y E T A R I

GRAMOZ RUÇI